

**DIE MISHANDELDE VROU IN DIE STRAFREG: 'N REGSVERGELYKENDE
ONDERSOEK**

ISSN 1727-3781



2009 VOLUME 12 No 4

DIE MISHANDELDE VROU IN DIE STRAFREG: 'N REGSVERGELYKENDE ONDERSOEK

THE BATTERED WOMAN IN CRIMINAL LAW: A LEGAL COMPARATIVE ENQUIRY

JL Matthee*

Summary

This article seeks to critically examine recent criminal law developments in Australia, England and Wales that specifically address the situation in which battered women find themselves. This article specifically focuses on the question of whether or not South Africa can learn something from these developments in order to make better provision for battered women who kill their abusers after having suffered through years of physical abuse. The question of whether or not a separate defence can be created for battered women in South Africa is also explored in this article. In order to answer this question, an investigation is launched into suggested defences in Australia, New Zealand and South Africa.

Keywords

Battered woman; criminal liability; reform; provocation; self-defence; diminished responsibility; separate defence; Australia; New Zealand; England; Wales

Male killing is about power and control. Women killing abusers is about avoiding power and control ... Women do not often kill from anger, while anger is what fuels many male killings.

Oliver Quick en Celia Wells¹

* Jacques Matthee. Tydelike dosent in die Regte, Noordwes-Universiteit, Potchefstroom-kampus. LLB, LLM. Hierdie artikel is 'n verwerking van 'n gedeelte van die outeur se LLM navorsing. Sien Matthee *Mishandelde vrou-sindroom*.

1 Inleiding

Gesinsgeweld bestaan sedert die man en vrou begin het om saam te leef.² Gesinsgeweld is diep gewortel in die Suid-Afrikaanse gemeenskap en het traumatiese nuwe-effekte op die slagoffers daarvan.³ Gesinsgeweld is geslag-spesifiek deurdat dit meestal geweld deur mans teenoor vroue behels.⁴ Daar word beraam dat 18% tot 25% van Suid-Afrikaanse vroue aan mishandeling binne 'n intieme verhouding onderwerp word.⁵ Vir vroue is die risiko om deur 'n lewensmaat gedood te word ook veel hoër as vir mans.⁶

In *S v Baloyi*⁷ het Sachs R aangedui dat gesinsgeweld 'n produk is van vroue se algemene ondergeskiktheid aan mans. In die Suid-Afrikaanse reg is vroue se ondergeskikte posisie in die familie en samelewing deur die man se maritale mag oor sy vrou weerspieël.⁸ Die Suid-Afrikaanse reg het ook vroeër van die veronderstelling uitgegaan dat vroue by huweliksluiting onherroeplik tot geslagsverkeer vir die duur van die huwelik toegestem het.⁹ Tot en met die inwerkingtreding van die *Wet op Voorkoming van Gesinsgeweld*¹⁰ in 1993 was dit dus wettig vir 'n man om geslagsverkeer op sy vrou af te dwing.¹¹ Die reg

1 Quick en Wells 2006 *CLR* 524.

2 *S v Ferreira* 2004 (2) SASV 454 (HHA) 472g-472h.

3 Bonthuys *et al* "Gender" 340; Pieterse-Spies 2006 *THRHR* 310.

4 Bonthuys *et al* (n 3) 341; Pieterse-Spies (n 3) 311; *S v Baloyi* 2000 (2) SA 425 (KH) par 12. Nicholson 2004 *De Rebus* 30 dui ook aan dat vroue beskou word as 'n samelewings-groep wat die meeste mishandel word.

5 Pieterse-Spies (n 3) 310-311. Bonthuys *et al* (n 3) 341 wys daarop dat "as many as one in two women are affected by some form of domestic violence". Sien ook Vetten 2005 www.csvr.org.za/ waar aangetoon word dat: "Four times a day these flat, emotionless records are compiled to account for the women killed every six hours by their intimate partners. This translates into a prevalence rate of 8.8 per 100 000 of the female population aged 14 years and older – the highest rate ever reported in research anywhere in the world". Vir verdere statistieke sien *S v Engelbrecht* 2005 (2) SASV 41 (W) 88e-g.

6 Pieterse-Spies (n 3) 310-311. Sien ook Vetten 2000 www.csvr.org.za/.

7 *S v Baloyi* 2000 (2) SA 425 (KH) par 12. Sien ook Pieterse-Spies (n 3) 315.

8 Bonthuys *et al* (n 3) 341. Vroue is egter nie meer ondergeskik aan hulle mans nie. Volgens Robinson, Human en Boshoff *Familiereg* 73 is die man se maritale mag oor sy vrou deur a 29 van die *Vierde Algemene Regswysigingswet* 132 van 1993 afgeskaf.

9 Bonthuys *et al* (n 3) 341.

10 Wet 133 van 1993.

11 Bonthuys *et al* (n 3) 341. Sien a 5 van die *Wet op Voorkoming van Gesinsgeweld* 133 van 1993 wat bepaal het dat 'n man weens verkragting van sy vrou skuldig bevind kan word.

wat 'n man histories geniet het om sy vrou redelike straf toe te dien, het ook die voorkoms van gesinsgeweld aangevuur.¹² Hierdie verskynsel is na verwys as die "rule of thumb" waarvolgens 'n man sy vrou kon slaan met 'n stok mits die stok nie dikker as sy duim was nie.¹³

Bogenoemde faktore het daartoe bygedra dat gesinsgeweld in Suid-Afrika nie as 'n sistematiese probleem en geslagsgeoriënteerde misdryf beskou is nie.¹⁴ Gesinsgeweld moet egter verstaan word as 'n sosiale probleem wat uit ons geskiedenis na vore tree en wat ongelyke sosiale, ekonomiese en kulturele verhoudings weerspieël.¹⁵ Die probleem rondom gesinsgeweld, en meer spesifiek die effek daarvan op Suid-Afrikaanse mishandelde vroue, word vererger deur die feit dat die gemeenskap gesinsgeweld grootliks aanvaar of ten minste duld.¹⁶

'n Groot hoeveelheid verhoudinge waarin mishandeling voorkom, eindig in sterftes deurdat die vrou nie langer haar posisie kan verduur nie en sodoende teen haar mishandelaar optree deur hom dood te maak.¹⁷ Wanneer mishandelde vroue hulle mishandelaars doodmaak, vind dit normaalweg plaas in gevalle waar die vroue se mishandelaars hulle aan jarelange mishandeling onderwerp het.¹⁸ Volgens O'Donovan¹⁹ betree hierdie vroue dan 'n strafregstelsel waar hulle verhoor en gevonnissen word deur houe wat hulle optrede of die beweegrede daaragter verkeerd verstaan of bloot ignoreer.

12 Die patriargale mitologie rondom gesinsgeweld sien geweld en mishandeling as iets natuurlik waarvoor vroue blameer word. Daar word selfs beweer dat hulle die mishandeling en geweld geniet en daarvoor vra. Sien Bonthuys *et al* (n 3) 341-342 in hierdie verband.

13 Bonthuys *et al* (n 3) 341. Die frase "rule of thumb" het sy oorsprong in die Engelse gemene reg gehad en dateer terug tot die 1700's. Sien in hierdie verband Sommers 1994 www.canlaw.com/rights/thumbul.htm.

14 Bonthuys *et al* (n 3) 342.

15 *Ibid.*

16 Dit blyk uit Bonthuys *et al* (n 3).

17 Pieterse-Spies (n 3) 311.

18 *Ibid.*

19 O'Donovan 1991 *JLS* 220. Sien ook Pieterse-Spies (n 3) 311.

In *S v Baloyi*²⁰ het Sachs R daarop gewys dat dit die staat se plig is om gesinsgeweld uit te roei en die gevolge daarvan te hanteer. In *S v Ferreira*²¹ beklemtoon Howie P ook dat die plaag van gesinsgeweld effektief deur die staat en gemeenskap hanteer moet word en, indien nodig, deur die howe. Teen hierdie agtergrond kan geargumenteer word dat artikel 39(2) van die *Grondwet van die Republiek van Suid-Afrika* 1996 (hierna Grondwet) gebruik kan word om moontlik die elemente van die uitgekristalliseerde regverdigingsgronde in die strafreg te ontwikkel ten einde die gees, strekking en doel van die Handves van Regte te bevorder. Volgens *S v Engelbrecht*²² bring dit mee dat, wanneer mishandelde vroue hulle weens jarelange mishandeling tot geweld wend, die bestaande regverdigingsgronde op só 'n wyse geïnterpreteer moet word dat die impak van die mishandeling op die vrou verreken word.²³

Die probleem is dat 'n mishandelde vrou na herhaaldelike mishandeling breekpunt kan bereik en haar mishandelaar doodmaak op 'n stadium wanneer daar geen aanval teen haar gerig is nie, byvoorbeeld wanneer die mishandelaar slaap.²⁴ Wanneer 'n mishandelde vrou uit die siklus van mishandeling wegbreek en teen haar mishandelaar optree kom die vraag na haar strafregtelike aanspreeklikheid ter sprake.²⁵ Alvorens 'n mishandelde vrou strafregtelik aanspreeklik kan wees, moes sy 'n misdryf gepleeg het. 'n Misdryf word omskryf as 'n "wederregtelike, skuldige doen of late".²⁶ Hieruit blyk die algemene vereistes vir 'n misdryf soos volg te wees: handeling, voldoening aan die omskrywingselemente van 'n misdryf, wederregtelikheid en skuld. Die

20 *S v Baloyi* 2000 (2) SA 425 (KH) par 1, 11, 26. Sien ook Pieterse-Spies (n 3) 315.

21 *S v Ferreira* 2004 (2) SASV 454 (HHA) 472b. Sien ook Nicholson (n 4) 29 en Vetten (n 6).

22 *S v Engelbrecht* 2005 (2) SASV 41 (W) 132a.

23 *S v Engelbrecht* 2005 (2) SASV 41 (W) 132a-b.

24 Bv *S v Engelbrecht* 2005 (2) SASV 41 (W) is die beskuldigde aangekla van moord op haar man, die oorledene. Op die dag van die oorledene se dood het hy die beskuldigde blootgestel aan verbale, fisiese, seksuele en emosionele mishandeling. Tydens die voorval was hy onder die invloed van alkohol. Toe hy aan die slaap raak het die beskuldigde sy hande met boeie vasgemaak en 'n plastieksak oor sy kop getrek as gevolg waarvan hy versmoor het. Satchwell R stel die volgende vraag: "The question is whether or not the law can and should acknowledge the stresses and strains under which Mrs Engelbrecht endured years of domestic violence so as to absolve her of criminal liability for her action in killing Mr Engelbrecht" (53E). Die meerderheid van die hof verwerp egter die beskuldigde se beroep op noodweer en vind haar skuldig aan moord op die oorledene.

25 Schuller en Vidmar 1992 *LHB* 275

26 Snyman *Strafreg* 5; Burchell *Criminal Law* 178.

elemente van wederregtelikheid en skuld staan veral op die voorgrond wanneer daar oor die aanspreeklikheid van die mishandelde vrou besin moet word.

In die Suid-Afrikaanse regspraak tot op hede is die feit dat 'n mishandelde 'n misdryf, byvoorbeeld moord of strafbare manslag, gepleeg het oor die boeg van bestaande verwere en regverdigingsgronde gegooi. Byvoorbeeld in *S v Engelbrecht*²⁷ was Satchwell R van mening dat die verweer van noodweer beskikbaar is vir 'n mishandelde vrou wat haar mishandelaar na jarelange, onvermydelike mishandeling doodmaak.²⁸ Die verweer van noodweer is nie in yster gegiet nie en kan uitgebrei word. Die vraag wat dus gevra moet word is of daar nie 'n uitbreiding van bestaande verwere in die geval van 'n mishandelde vrou moet plaasvind nie.²⁹ Indien 'n uitbreiding van bestaande verwere nie die gekose uitweg is nie, kan daar gevra word of 'n afsonderlike verweer vir mishandelde vroue nie geskep moet word nie. 'n Soortgelyke vraag is deur Satchwell R³⁰ in *S v Engelbrecht* oorweeg toe die hof versoek is om weg te beweeg van 'n individuele regverdigingsgrond, soos noodweer, na 'n algemene verweer van redelikheid.

Die verskynsel van mishandelde vroue wat hulle mishandelaars doodmaak is egter nie uniek aan Suid-Afrika nie en kom wêreldwyd voor. In Australië, Nieu-Seeland, Engeland en Wallis het daar onlangs verwikkelinge plaasgevind wat die situasie waarin mishandelde vroue verkeer, spesifiek aanspreek.³¹ Daar is ook in hierdie lande oorweeg of 'n afsonderlike verweer vir mishandelde vroue geskep kan word.³² In hierdie artikel word 'n regsvergelykende ondersoek geloods na die verwikkelinge in hierdie lande. Die ondersoek het ten doel om

27 *S v Engelbrecht* 2005 (2) SASV 41 (W) 132f, 134c-d. Sien ook Grant 2005 ASSAL 664.

28 Pieterse-Spies (n 3) 317.

29 'n Verdere vraag wat gevra kan word is of die strafreg voorsiening kan maak vir mishandelde vroue wat hulle mishandelaars doodmaak deur die formele en informele strafvermindering. Formele strafvermindering vind plaas wanneer 'n misdryf wat spesifieke opset vereis (soos moord) tot een met minder opset (soos strafbare manslag) "verminder" word. Informele strafvermindering vind weer plaas wanneer 'n mishandelde vrou skuldig bevind word aan moord met versagende omstandighede. Formele en informele strafvermindering val egter buite die omvang van hierdie bespreking. Vir 'n meer volledige bespreking van strafvermindering sien Van der Merwe *Verminderde Strafbaarheid*.

30 *S v Engelbrecht* 2005 (2) SASV 41 (W) 157h.

31 Sien par 2 en 3.

32 Sien 4.2 en 5.3.

vas te stel of die Suid-Afrikaanse reg by een of meer van hierdie jurisdiksies kan kers opsteek.

2 Verwikkelinge in Australië

2.1 Algemeen

In 1996 is 'n ondersoek na die verwere van provokasie en noodweer geloods.³³ Hierdie ondersoek is, onder andere, pertinent binne die konteks van moorde tussen lewensmaats gedoen.³⁴ Die ondersoek was noodsaaklik as gevolg van die hoë moordsyfer tussen lewensmaats in Australië.³⁵ Sedertdien het verskeie hervormings ten opsigte van die verwere van noodweer en provokasie in etlike Australiese state plaasgevind.³⁶ Vervolgens word enkele van die belangrikste hervormings kortliks uiteengesit.

2.2 Hervorming van die verweer van noodweer

Die verweer van noodweer is onlangs in Victoria³⁷ en Wes-Australië³⁸ hervorm. In beide state word noodweer statutêr gereël en is die aard en omvang van die verweer soortgelyk in beide hierdie state.³⁹ In beide Victoria en Wes-Australië kan 'n mishandelde vrou wat van moord op haar mishandelaar aangekla word, aanvoer dat sy in noodweer teen hom opgetree het.

33 Roth *Briefing Paper No 3/07* 1.

34 Roth (n 33) 1.

35 Gedurende 1989 tot 2002 was daar op nasionale vlak 77 moorde tussen intieme lewensmaats in Australië. Gedurende 2004 tot 2005 was daar 66 moorde tussen intieme lewensmaats. Vir verdere statistieke in verband met moorde tussen lewensmaats en mishandelde vroue se beroep op die verwere van noodweer en provokasie, sien Roth (n 33) 4-8, 10, Mouzos en Rushforth 2003 *TICCJ* 2 en VLRC *Options Paper* xiii, xiv, 52, 110.

36 Sien par 2.2 en 2.3.

37 In 2005 is die verweer van noodweer op aanbeveling van die Regshervormingskommissie van Victoria gekodifiseer. Sien Roth (n 33) 23, 25.

38 In Wes-Australië is die gekodifiseerde verweer van noodweer, soos vervat in die *Criminal Code*, in 2008 op grond van voorstelle deur die Regshervormingskommissie hervorm. Sien in hierdie verband LRCWA *Final Report* 172.

39 In Victoria word noodweer in die algemeen deur a 9AC en 9AE *Crimes Act* 1958 gereël, terwyl a 9AH spesifieke bepalings in verband met 'n beroep op noodweer by voorvalle van gesinsgeweld bevat. In Wes-Australië word noodweer deur a 248 *Criminal Code Act Compilation Act* 1913 gereël.

Die blote feit dat 'n mishandelde vrou haar in Victoria en Wes-Australië op noodweer kan beroep, beteken nie dat die vereistes vir die verweer enigsins afgewater is nie. Sy moet steeds daarvan oortuig wees dat die geweld wat sy teenoor haar mishandelaar gebruik noodsaaklik is om haarself te verdedig.⁴⁰ Haar oortuiging moet op redelike gronde gebaseer wees.⁴¹ 'n Mishandelde vrou kan ook in noodweer teen haar mishandelaar optree selfs al is daar nie 'n onmiddellik dreigende aanval van sy kant nie.⁴² Op hierdie manier word voorsiening gemaak vir mishandelde vroue wat teen hulle mishandelaars se onvermydelike aanvalle optree.

In Victoria word bepaal dat daar in gevalle van gesinsgeweld geen proporsionaliteit tussen die mishandelaar se aanval en die mishandelde vrou se afweershandeling hoef te wees nie.⁴³ In Wes-Australië is daar nie so 'n uitdruklike bepaling nie. In Wes-Australië word weer vereis dat 'n mishandelde vrou se optrede in noodweer 'n redelike reaksie op die omstandighede, soos gesien uit haar oogpunt, moet wees.⁴⁴

In Victoria en Wes-Australië verskil die effek van 'n suksesvolle beroep op noodweer. In Victoria lei 'n suksesvolle beroep op noodweer tot 'n algehele onskuldigbevinding.⁴⁵ In Wes-Australië verminder 'n suksesvolle beroep op noodweer slegs 'n aanklag van moord na een van strafbare manslag.⁴⁶

Noodweer is egter nie die enigste verweer wat onlangs in Australië hervorm is nie. Die verweer van provokasie is ook onlangs hervorm, welke hervorming vervolgens aan die beurt kom.

40 Hierdie beginsel is vervat in a 9AC en 9AE *Crimes Act* 1958 en a 248(4)(a) *Criminal Code Act Compilation Act* 1913.

41 In Victoria word hierdie beginsel in a 9AE en 9AH(1) *Crimes Act* 1958 vervat, terwyl dit in Wes-Australië in a 248(4)(c) *Criminal Code Act Compilation Act* 1913 vervat is.

42 Sien a 9AH(1)(c) *Crimes Act* 1958 en a 248(4)(a) *Criminal Code Act Compilation Act* 1913 vir hierdie beginsel.

43 Hierdie beginsel is vervat in a 9AH(1)(d) *Crimes Act* 1958.

44 A 248(4)(b) *Criminal Code Act Compilation Act* 1913.

45 Dit blyk uit a 9AC en 9AE *Crimes Act* 1958. Sien ook Roth (n 33) 25.

46 A 248(3) *Criminal Code Act Compilation Act* 1913.

2.3 *Hervorming van die verweer van provokasie*

In 2008 het 'n wysiging aan die verweer van provokasie in die Noordelike Gebiede in werking getree.⁴⁷ Hierdie verweer word statutêr gereël en is slegs 'n gedeeltelike verweer op 'n aanklag van moord.⁴⁸

In die Noordelike Gebiede kan 'n mishandelde vrou haar op die verweer van provokasie beroep indien sy aan twee vereistes voldoen. Die eerste vereiste is dat sy 'n verlies aan selfbeheersing moet ervaar, welke verlies deur haar mishandelaar se provokerende optrede veroorsaak moet word.⁴⁹ Daar word nie vereis dat haar verlies aan selfbeheersing skielik ('suddenly') moet plaasvind alvorens sy haar op provokasie kan beroep nie.⁵⁰

Die tweede vereiste is dat die mishandelaar se provokerende optrede sodanig moet wees dat dit kan veroorsaak dat 'n normale persoon selfbeheersing tot so 'n mate kan verloor, dat sy (normale persoon) die opset om die mishandelaar dood te maak, ontwikkel.⁵¹ Vir 'n suksesvolle beroep op provokasie is dit voldoende dat die mishandelaar se provokerende optrede uit erge beledigende woorde of optrede bestaan.⁵²

In die Noordelike Gebiede is dit vir 'n mishandelde vrou moontlik om haar op provokasie te beroep "... regardless of whether the conduct of the deceased occurred immediately before the conduct causing death or at an earlier time".⁵³ 'n Mishandelde vrou kan haar dus op provokasie beroep selfs al is daar 'n tydsverval tussen haar optrede en dié van haar mishandelaar. Verder word 'n redelike proporsionaliteit tussen 'n mishandelde vrou se optrede en dié van haar mishandelaar nie vereis vir 'n beroep op die verweer van provokasie in die Noordelike Gebiede nie.⁵⁴

47 Die verweer van provokasie is gewysig deur a 17 *Criminal Reform Amendment Act (No 2)* 2006 (Wet 34 van 2006).

48 A 158 *Criminal Code Act*.

49 Hierdie beginsel is vervat in a 158(2)(a) *Criminal Code Act*.

50 Sien a 158(6)(b) *Criminal Code Act* vir hierdie beginsel.

51 Dit is die beginsel wat vervat is in a 158(2)(b) *Criminal Code Act*.

52 Hierdie beginsel word vervat in a 158(3) *Criminal Code Act*.

53 A 158(4) *Criminal Code Act*.

54 A 158(6)(a) *Criminal Code Act*.

3 Verwikkelinge in Engeland en Wallis

3.1 Algemeen

Op grond van voorstelle gemaak deur die Regskommissie, stel die regering van die Verenigde Koninkryk voor dat die verwere van provokasie en verminderde toerekeningsvatbaarheid in Engeland en Wallis hervorm moet word.⁵⁵ Die voorstelle wat die regering maak spreek spesifiek die situasie waarin 'n mishandelde vrou verkeer aan.⁵⁶ Vervolgens word hierdie voorstelle kortliks van nader beskou.

3.2 Hervorming van die verweer van provokasie

In Engeland en Wallis is die verweer van provokasie slegs 'n gedeeltelike verweer op 'n aanklag van moord en word dit statutêr gereël.⁵⁷ Die jongste voorstelle van die regering is dat hierdie gedeeltelike verweer heeltemal afgeskaf moet word en deur twee nuwe gedeeltelike verwere vervang behoort te word.⁵⁸

Die eerste verweer wat die regering voorstel is die gedeeltelike verweer van doodmaak op grond van 'n vrees vir ernstige geweld.⁵⁹ Volgens die regering maak hierdie verweer voorsiening vir 'n mishandelde vrou wat haar mishandelaar doodmaak ten einde 'n aanval te keer wat in die toekoms verwag word, maar wat nie onmiddellik dreigend is nie.⁶⁰ Ten einde misbruik van

55 MJ *Consultation Paper CP19/08* 1, 2, 4-6. Vir 'n volledige uiteensetting van die voorstelle wat die Regskommissie gemaak het sien Humphreys *et al Law Com No 304* 12. Die regering se voorstelle is vervat in die *Coroners and Justice Bill* wat tans deur die Parlement oorweeg word. Vir meer inligting in verband met die vordering van hierdie wetsontwerp sien Bills 2008-2009 www.justice.gov.uk/

56 Daar moet egter in gedagte gehou word dat die regering se voorstelle nie uitsluitlik gemaak word met die oog op mishandelde vroue wat hulle mishandelaars doodmaak nie.

57 Sien a 3 *Homicide Act* 1957, MJ (n 55) 7, Humphreys *et al* (n 55) 11, 43 en Elliott en Quinn *Criminal Law* 255.

58 MJ (n 55) 9, 34.

59 MJ (n 55) 9, 33.

60 MJ (n 55) 10. Die regering lê egter klem daarop dat hierdie gedeeltelike verweer nie daarop gerig is om inbreuk te maak op noodweer nie. Volgens die regering was, is en sal noodweer altyd 'n volkome verweer op 'n aanklag van moord of enige ander gewelddadige

hierdie verweer te voorkom stel die regering sekere voorsorgmaatreëls voor. Die eerste voorsorgmaatreël behels dat 'n mishandelde vrou haar net suksesvol op hierdie gedeeltelike verweer kan beroep indien haar mishandelaar die oorsaak van die geweld is.⁶¹ Ingevolge die tweede voorsorgmaatreël kan 'n mishandelde vrou net haar mishandelaar in reaksie op 'n vrees vir ernstige geweld doodmaak indien sy dreigement van geweld teen haar of ander persone gerig is.⁶²

Die tweede verweer wat die regering voorstel sou net in buitengewone omstandighede geopper kan word.⁶³ Hierdie verweer behels die gedeeltelike verweer van "doodmaak in reaksie op woorde of gedrag wat veroorsaak dat 'n mishandelde vrou 'n regverdigbare gevoel het dat sy ernstig veronreg is".⁶⁴ Die regering stel ook 'n voorsorgmaatreël voor ten einde misbruik van hierdie verweer te voorkom. Op grond van hierdie voorsorgmaatreël kan 'n mishandelde vrou nie op hierdie gedeeltelike verweer steun waar sy bogenoemde woorde of gedrag aan die kant van haar mishandelaar uitgelok het sodat sy 'n verskoning of rede gehad het om geweld teenoor hom te gebruik nie.⁶⁵

Ten opsigte van beide bogenoemde verwerre stel die regering voor dat 'n verlies aan selfbeheersing steeds getoon moet word alvorens 'n beroep op die verwerre gedoen kan word.⁶⁶ Die regering stel verder voor dat daar weggedoen moet word met die vereiste dat daar 'n skielike ('sudden') verlies aan selfbeheersing moet wees.⁶⁷ Volgens die regering maak laasgenoemde voorstel voorsiening vir daardie gevalle waar 'n beskuldigde se reaksie op die

oortreding wees.

61 Hierdie beginsel blyk uit MJ (n 55) 13, 33.

62 Hierdie beginsel blyk uit MJ (n 55) 13, 33.

63 MJ (n 55) 10, 12, 33.

64 MJ (n 55) 10, 12, 33. Die Regskommissie het daarop gewys dat die kumulatiewe effek van herhaaldelike provokasie, in omstandighede waar dit vir 'n mishandelde vrou onmoontlik is om van die provokasie se effek te ontsnap, 'n voorbeeld is van omstandighede wat kan aantoon hoe grof die provokasie is of hoe regverdigbaar dit vir haar sal wees om ernstig veronreg te voel. Sien in hierdie verband Humphreys *et al* (n 55) 87.

65 Dit blyk uit MJ (n 55) 13, 33.

66 MJ (n 55) 12-13.

67 MJ (n 55) 13. Die regering se voorstel hier stem ook ooreen met die hervorming van provokasie in die Noordelike Gebiede. Sien weer par 2.3.

provokerende optrede geleidelik opbou of uitgestel word.⁶⁸ In die lig hiervan kan geargumenteer word dat die regering se voorstel in hierdie verband voorsiening maak vir die situasie waarin 'n mishandelde vrou verkeer, aangesien haar optrede teenoor haar mishandelaar geleidelik opbou of uitgestel word.

Die regering stel verder voor dat die twee nuwe gedeeltelike verweere ooreenkomstig die objektiewe redelike mens-maatstaf beoordeel moet word.⁶⁹

Die voorstel lui soos volg:

We ... propose that the partial defences should apply only if a person of the defendant's sex and age, with a normal degree of tolerance and self-restraint and in the circumstances of the defendant, might have reacted in the same or a similar way.⁷⁰

Tesame met die hervorming van die gedeeltelike verweer van provokasie, stel die regering ook voor dat die verweer van verminderde toerekeningsvatbaarheid hervorm word.

3.3 *Hervorming van verminderde toerekeningsvatbaarheid*

Verminderde toerekeningsvatbaarheid is 'n gedeeltelike verweer wat statutêr gereël word.⁷¹ Die regering stel egter 'n nuwe definisie vir verminderde toerekeningsvatbaarheid voor wat in konsepwetgewing opgeneem is, naamlik:

- (1) A person ("P") who kills or is a party to the killing of another is not to be convicted of murder if P was suffering from a relevant mental impairment which provides an explanation for P's acts and omissions in doing or being a party to the killing.
- (1A) "Relevant mental impairment" means an abnormality of mental functioning which –
 - (a) arises from a recognised medical condition, and

68 Sien in hierdie verband MJ (n 55) 13.

69 Sien MJ (n 55) 13. Die regering se voorstel stem dus ooreen met die hervorming van provokasie in die Noordelike Gebiede. Sien weer par 2.3.

70 MJ (n 55) 13.

71 Sien a 2(1) en (3) *Homicide Act* 1957, MJ (n 55) 14, Humphreys *et al* (n 55) 11, 43 en Elliott en Quinn (n 57) 255.

(b) substantially impairs P's ability to do one or more of the following –

- (i) to understand the nature of P's conduct;
- (ii) to form a rational judgment;
- (iii) to exercise self-control.

(1B) For the purposes of subsection (1), a relevant mental impairment provides an explanation for P's conduct if it causes, or is a significant contributory factor in causing, the person to carry out that conduct.⁷²

Hieruit blyk dit dat die regering voorstel dat verminderde toerekeningsvatbaarheid voortaan 'n volkome verweer op 'n aanklag van moord moet wees.⁷³ Uit die konsepwetgewing blyk dit met die eerste oogopslag ook asof die voorgestelde hervorming nie vir die situasie waar mishandelde vroue moorvoorsiening maak nie, aangesien haar gemoedstoestand tydens die moorddadige handeling as 'n sielkundige toestand beskou word wat eintlik in die sielkunde tuishoort.⁷⁴

In sy voorstelle aan die regering, het die Regskommissie aangedui dat 'n *'more than trivial'* mediese toestand voldoende behoort te wees vir 'n beroep op die voorgestelde hervormde verweer van verminderde toerekeningsvatbaarheid.⁷⁵ Volgens die Regskommissie is dit slegs belangrik dat die mediese toestand 'n mishandelde vrou se verstandelike vermoë wesenlik moet aantas.⁷⁶ Volgens die Regskommissie is die effek van hierdie bepaling dat neurotiese versteurings, net soos erkende psigotiese versteurings, binne die omvang van die voorgestelde hervorming sal val.⁷⁷ As voorbeeld van so 'n neurotiese versteuring het die Regskommissie verwys na die post-traumatische stres waaraan mishandelde vroue weens jarelange mishandeling ly.⁷⁸ In die lig hiervan kan mishandelde vroue wel op die regering se voorgestelde hervorming

⁷² MJ (n 55) 35.

⁷³ Sien MJ (n 55) 35.

⁷⁴ Sien in hierdie verband Anon 1990 *Harv LR* 1384-1389; Eastaer "Battered women who kill" 38; Reddi 2005 *SACJ* 260-262, 270-271 en Craven 2003 www.austdvclearing-house.unsw.edu.au/

⁷⁵ Humphreys *et al* (n 55) 103.

⁷⁶ Humphreys *et al* (n 55) 103.

⁷⁷ Humphreys *et al* (n 55) 103.

⁷⁸ Humphreys *et al* (n 55) 103, 105.

van verminderde toerekeningsvatbaarheid steun, sou die regering die Regskommissie se voorstelle aanvaar.

4 Resente verwikkelinge en Suid-Afrika

Dit is onwaarskynlik dat die hervorming van noodweer in Victoria en Wes-Australië enigiets vir Suid-Afrika kan beteken. In Suid-Afrika het Satchwell R⁷⁹ reeds in *S v Engelbrecht* 'n uitbreiding van die dreigende vereiste by die verweer van noodweer voorgestel. Satchwell R⁸⁰ was van mening dat waar mishandeling so gereeld plaasvind dat dit as 'n siklus getipeer kan word, die dreigende-vereiste uitgebrei behoort te word om só onvermydelike mishandeling in te sluit.⁸¹ Sy baseer haar mening op die Kanadese saak *R v Lavallee*⁸² waarin gesê is dat, indien 'n vrou moet wag tot 'n aanval in die proses is voordat haar vrees regverdigbaar sal wees, dit daarop sal neerkom dat sy in dele of paaielemente vermoor word.⁸³ Die Kanadese Hooggeregshof het in hierdie verband die volgende siening gehuldig:

... Society gains nothing, except perhaps the additional risk that the battered woman will herself be killed, because she must wait until her abusive husband instigates another battering episode before she can justifiably act ...⁸⁴

Satchwell R⁸⁵ kom dan tot die gevolgtrekking dat 'n mishandelde vrou se voorafbeplande verdedigende optrede nie onbestaanbaar sal wees met haar aanspraak op die dreigende-vereiste van 'n regverdigingsgrond nie. Met hierdie benadering kan nie saamgestem word nie. Dit hou die risiko in dat noodweer misbruik kan word in gevalle waar 'n mishandelde vrou bloot op 'n dag besluit om haar mishandelaar dood te maak ten einde van hom ontslae te raak. Indien daar weggedoen word met die dreigende-vereiste óf dit word uitgebrei, soos

79 *S v Engelbrecht* 2005 (2) SASV 41 (W) 134c.

80 *S v Engelbrecht* 2005 (2) SASV 41 (W) 134c.

81 Sien ook Grant (n 27) 664.

82 *R v Lavallee* 1990 (1) SCR 852 (SCC).

83 *S v Engelbrecht* 2005 (2) SASV 41 (W) 134a-b; *R v Lavallee* 1990 (1) SCR 852 (SCC).

84 *R v Lavallee* 1990 (1) SCR 852 (SCC). Die hof het uit Willoughby 1989 *U Kan L Rev* 169 184 aangehaal.

85 *S v Engelbrecht* 2005 (2) SASV 41 (W) 134d.

voorgestel deur Satchwell R, sal 'n mishandelde vrou nie haar besluit in die hitte van die oomblik kan regverdig nie. Sou 'n redelike tydperk tussen die mishandelaar se aanval en die mishandelde vrou se reaksie daarop verloop het, kan die moontlikheid ook ter sprake kom dat sy in weerwraak opgetree het.⁸⁶ Sy behoort dus nie suksesvol op noodweer te kan steun waar daar geen dreigende aanval is nie, aangesien:

... a woman who kills her abuser, after he has attacked her, and in anticipation of future assaults, will have acted unlawfully as her actions will have occurred at a time when she was not actually facing harm or an imminent threat of harm.⁸⁷

In Suid-Afrika kan die provokerende optrede van die mishandelaar daartoe aanleiding gee dat 'n mishandelde vrou nie oor die nodige opset vir 'n skuldigbevinding beskik nie.⁸⁸ Wanneer sy haar op 'n aanklag van moord suksesvol op provokasie as opset-uitsluitingsgrond beroep, kan sy aan strafbare manslag, in plaas van moord, skuldig bevind word.⁸⁹ Ten einde te bepaal of 'n mishandelde vrou die opset gehad het om haar mishandelaar dood te maak, word faktore soos 'n proporsionaliteit en tydsverloop tussen haar mishandelaar se provokerende optrede en haar reaksie daarop in ag geneem.⁹⁰ In Suid-Afrika kan provokasie ook daartoe aanleiding gee dat die mishandelde vrou tydens die doodmaak van haar mishandelaar nie-patologies ontoerekeningsvatbaar kan wees.⁹¹ Indien haar beroep op nie-patologiese ontoerekeningsvatbaarheid suksesvol is, lei dit tot 'n algehele onskuldigbevinding.⁹² Dit spreek vanself dat

86 *R v Lavallee* 1990 (1) SCR 852 (SCC).

87 Reddi (n 74) 270.

88 Snyman (n 26) 239. Sien ook Burchell (n 26) 427-428.

89 Snyman (n 26) 240.

90 Snyman (n 26) 242.

91 Sien in hierdie verband *S v Eadie* 2001 (1) SASV 172 (K) 177d-e, Burchell (n 26) 428 en Snyman (n 26) 238. Provokasie moet egter nie met humeur-verlies verwar word nie. 'n Verlies van beheer oor emosionele reaksies (humeur-verlies) verskil van die verlies van kognitiewe beheer (veroorsaak deur provokasie). Humeur-verlies is nie voldoende om strafregtelike aanspreeklikheid uit te sluit nie, aangesien misdade voortvloeiend uit argumente of emosionele konflik meestal nie deur provokasie voorafgegaan word nie. Om jou humeur te verloor is 'n algemene verskynsel wat as 'n strafversagende faktor kan dien. Sien in dié verband *S v Kok* 2001 (2) SASV 106 (HHA) 115j, *S v Henry* 1999 (2) SASV 13 (HHA) 20d-f en *S v Eadie* 2002 (3) SA 719 (HHA) 738H, 740F.

92 Hierdie posisie blyk uit *S v Eadie* 2002 (3) SA 719 (HHA) 720H-720I, 747D. Sien in hierdie verband ook *S v Els* 1993 (1) SASV 723 (O) 725g en *S v Potgieter* 1994 (1) SASV 61 (A) 72f.

dit vir 'n mishandelde vrou wat weens provokasie haar mishandelaar doodmaak, voordeliger sal wees om, indien suksesvol, haar eerder op 'n volkome verweer in plaas van 'n gedeeltelike verweer te beroep.

In Suid-Afrika word 'n beroep op provokasie verder subjektief beoordeel.⁹³ Die vraag is hoe 'n mishandelde vrou, met inagneming van haar persoonlike eienskappe, op haar mishandelaar se provokerende optrede gereageer het.⁹⁴ Daar kan geargumenteer word dat die subjektiewe beoordeling van 'n beroep op provokasie voordeliger is as die objektiewe beoordeling daarvan in die Noordelike Gebiede. 'n Objektiewe beoordeling hou die risiko in dat 'n mishandelde vrou se optrede gemeet kan word teen die optrede van 'n persoon wat nog nooit aan mishandeling blootgestel is nie en dus nie begrip kan hê vir die situasie waarin sy verkeer nie. 'n Subjektiewe beoordeling stel 'n Suid-Afrikaanse hof in staat om in die skoene van 'n mishandelde vrou tydens die doodmaak van haar mishandelaar te tree. Sodoende kan die situasie waarin sy verkeer (haar mishandeling en die effek daarvan op haar, wat veroorsaak dat sy haar mishandelaar doodmaak) in 'n beter lig beoordeel word.

In Suid-Afrika word 'n mishandelde vrou se verminderde toerekeningsvatbaarheid slegs in aanmerking geneem by vonnisoplegging.⁹⁵ Verminderde toerekeningsvatbaarheid is dus nie 'n verweer in die Suid-Afrikaanse reg nie.⁹⁶ Daarom kan dit vir die Suid-Afrikaanse reg, en meer spesifiek mishandelde vroue, van waarde wees om 'n verweer van verminderde toerekeningsvatbaarheid op 'n soortgelyke grondslag as in Engeland en Wallis, te skep. So 'n ontwikkeling van die Suid-Afrikaanse reg is nie onmoontlik nie, veral as daar in

93 Snyman (n 26) 241.

94 *Ibid.*

95 Hierdie beginsel blyk uit a 78(7) *Strafproseswet* 51 van 1977; *Director of Public Prosecutions: Transvaal v Venter* 430/2007 2008 ZASCA 76 par 21; *S v Laubscher* 1988 (1) SA 163 (A) 167J-168A; *S v Shapiro* 1994 (1) SASV 112 (A) par 24 en Burchell (n 26) 400. Verminderde toerekeningsvatbaarheid bestaan uit patologiese verminderde toerekeningsvatbaarheid asook nie-patologiese verminderde toerekeningsvatbaarheid. Die onderskeid tussen hierdie vorme is dieselfde as in die geval van patologiese en nie-patologiese ontoerekeningsvatbaarheid.

96 *Director of Public Prosecutions: Transvaal v Venter* 430/2007 2008 ZASCA 76 par 47; *S v Laubscher* 1988 (1) SA 163 (A) 168A; *S v Shapiro* 1994 (1) SASV 112 (A) par 24.

gedagte gehou word dat die Suid-Afrikaanse reg in *Pearl Assurance Co Appellant v Union Government Respondent*⁹⁷ soos volg omskryf is:

... a virile living system of law, ever seeking, as every such system must, to adapt itself consistently with its inherent basic principles to deal effectively with the increasing complexities of modern organised society.

5 Afsonderlike verweer vir mishandelde vroue

5.1 Algemeen

Die skep van 'n afsonderlike verweer vir mishandelde vroue is in Australië deur die Regshervormingskommissie van Victoria, en in Nieu-Seeland deur die Regskommissie oorweeg.⁹⁸ In Suid-Afrika het die skep van 'n afsonderlike verweer vir mishandelde vroue onlangs in regspraak ter sprake gekom.⁹⁹ In die bespreking wat volg sal die lewensvatbaarheid van sodanige afsonderlike verweer ondersoek word.¹⁰⁰

5.2 Afsonderlike verweer in Australië

Die Regshervormingskommissie van Victoria het aanbeveel dat 'n afsonderlike verweer vir mishandelde vroue geskep moet word ten einde te verseker dat noodweer effektief vir hierdie vroue werk.¹⁰¹ Die Kommissie het drie modelle vir so 'n nuwe verweer oorweeg.¹⁰² Die eerste model is die mishandelde vrou-sindroom model ("battered woman syndrome model") wat van 'n mishandelde vrou vereis om aan te toon dat sy aan die mishandelde vrou-sindroom ly.¹⁰³ Die tweede model wat hulle oorweeg het, is die selfbehoudmodel ("self-preservation model").¹⁰⁴ Ingevolge hierdie model moet 'n mishandelde vrou werklik glo dat sy nie teen die mishandeling beskerm kan word nie.¹⁰⁵ Sy moet

97 *Pearl Assurance Co Appellant v Union Government Respondent* 1934 AD 560 563.

98 Sien par 5.2 en 5.3.

99 Sien par 5.4.

100 Sien par 5.2-5.4.

101 VLRC *Final Report* 64.

102 VLRC (n 101) 64. Sien ook VLRC (n 35) xxi.

103 VLRC (n 101) 64; Roth (n 33) 24. Sien ook VLRC (n 35) xxi.

104 VLRC (n 35) xxi.

105 VLRC (n 101) 64; Roth (n 33) 24.

oortuig wees dat die doodmaak van haar mishandelaar noodsaaklik is vir haar selfbehoud.¹⁰⁶ Laastens het die Kommissie die afdwingende beheer model ("coercive control model") oorweeg.¹⁰⁷ Ingevolge hierdie model word daar gefokus op die mishandelde vrou se behoefte om haarself los te maak van omstandighede waar sy aan dwingende beheer onderwerp word.¹⁰⁸ Die Kommissie het daarop gewys dat alhoewel die fokus van elke model verskil, al drie daarop gerig is om probleme te oorkom wat moorddadige mishandelde vroue ervaar wanneer hulle op bestaande verwere steun.¹⁰⁹

Volgens die Kommissie is daar verskeie argumente vir die skep van 'n afsonderlike verweer vir mishandelde vroue.¹¹⁰ Eerstens sal 'n afsonderlike verweer erkenning verleen aan die realiteit van mishandelde vroue se reaksies op geweld.¹¹¹ Tweedens sal 'n groter hoeveelheid mishandelde vroue wat hulle mishandelaars doodmaak, van 'n verweer voorsien word.¹¹² Die skep van 'n afsonderlike verweer sal ook verseker dat die reg meer seker is vir moorddadige mishandelde vroue.¹¹³ Hierdie is oortuigende argumente wat ook in Suid-Afrika vir die skep van 'n afsonderlike verweer vir mishandelde vroue aangevoer kan word.

Die Kommissie wys egter op die verskeie argumente wat teen die skep van 'n afsonderlike verweer vir moorddadige mishandelde vroue geopper kan word.¹¹⁴ Volgens die Kommissie is die hoofargument teen die skep van 'n afsonderlike verweer, dat die geldende reg eerder gewysig moet word sodat dit voorsiening maak vir die ervarings van mishandelde vroue wat weens 'n geskiedenis van geweld hulle mishandelaars doodmaak.¹¹⁵ Op hierdie manier sal enige ingewikkeldheid in die bekendstelling van 'n afsonderlike verweer vermy word.¹¹⁶ Daar-

106 VLRC (n 101) 64; Roth (n 33) 24. Sien ook VLRC (n 35) xxi.

107 VLRC (n 35) xxi.

108 VLRC (n 101) 64; Roth (n 33) 24. Sien ook VLRC (n 35) xxi.

109 VLRC (n 101) 65.

110 VLRC (n 101) 65.

111 *Ibid.*

112 *Ibid.*

113 *Ibid.*

114 *Ibid.*

115 *Ibid.*

116 *Ibid.*

benewens is die Kommissie se argument dat die omvang van 'n afsonderlike verweer te eng sal wees indien die verweer slegs beperk word tot vroue in mishandelende verhoudings en nie ook tot enige slagoffer wat weens gesinsgeweld oorgaan tot moord of geweld nie.¹¹⁷ Volgens die Kommissie sal die gemeenskap ook probleme hê met die aanvaarding van 'n afsonderlike verweer vir mishandelde vroue.¹¹⁸ In hierdie verband het die Kommissie geargumenteer dat die skep van 'n afsonderlike verweer gesien kan word as 'n manier om aan mishandelde vroue 'n "vrypas om te moor" te gee.¹¹⁹ Hierdie argumente kan ook teen die skep van 'n afsonderlike verweer in die Suid-Afrikaanse reg geopper word.

In die lig van bogenoemde teenargumente het die Kommissie uiteindelik teen die skep van 'n afsonderlike verweer vir mishandelde vroue besluit.¹²⁰ Die Kommissie gaan van die standpunt uit dat noodweer eerder hervorm moet word ten einde te verseker dat dit plek maak vir mishandelde vroue se ervarings.¹²¹ Soos reeds aangedui kan laasgenoemde standpunt nie in die Suid-Afrikaanse reg ondersteun word nie, omdat daar 'n risiko is dat mishandelde vroue dan noodweer kan misbruik in 'n poging om strafregtelike aanspreeklikheid vir die doodmaak van hulle mishandelaars vry te spring.¹²²

5.3 Afsonderlike verweer in Nieu-Seeland

Die Regskommissie van Nieu-Seeland het na drie moontlike verwerre verwys toe hulle die skep van 'n afsonderlike verweer vir mishandelde vroue oorweeg het.¹²³ Die eerste verweer behels 'n gedeeltelike verweer van selfbehoud ("selfpreservation").¹²⁴ Die verweer van selfbehoud is beskikbaar aan 'n vrou

117 *Ibid.* Die Regshervormingskommissie wys daarop dat gesinsgeweld nie beperk is tot vroue in heteroseksuele verhoudings nie. Gesinsgeweld kan ook deur kinders, ouers, grootouers, manlike lewensmaats en persone in homoseksuele verhoudings ervaar word.

118 VLRC (n 101) 65.

119 *Ibid.*

120 VLRC (n 101) 68; Roth (n 33) 24.

121 VLRC (n 101) 68; Roth (n 33) 25.

122 Sien weer par 4.

123 NZLC *Preliminary Paper 41* par 68; NZLC *Report 73* 27.

124 NZLC *Preliminary Paper 41* par 70; NZLC *Report 73* 27. In Nieu-Seeland sal 'n suksesvolle beroep op selfbehoud dus 'n aanklag van moord na strafbare manslag verminder.

wat 'n ander persoon doodmaak, indien sekere vereistes bevredig word. Eerstens moes die vrou 'n persoon doodmaak met wie sy in 'n intieme verhouding betrokke is of betrokke was.¹²⁵ Tweedens moes die persoon wat sy doodgemaak het haar aan rasse, seksuele en/of fisiese mishandeling of intimidasie onderwerp het.¹²⁶ Die derde vereiste is dat die vrou weens die mishandeling of intimidasie eerlik moes geglo het dat sy nie teen die mishandeling of intimidasie beskerm kan word nie.¹²⁷ Die laaste vereiste behels dat die mishandelde vrou daarvan oortuig moet wees dat die doodmaak van haar mishandelaar noodsaaklik is vir haar selfbehoud.¹²⁸ Ingevolge die verweer van selfbehoud word die omstandighede waarin 'n mishandelde vrou verkeer objektief beoordeel in dié opsig dat daar ondersoek word of sy in 'n verhouding met die mishandelaar betrokke was en of hy haar aan mishandeling onderwerp het.¹²⁹ Haar behoefte om geweld teenoor haar mishandelaar te gebruik word weer subjektief, ooreenkomstig haar sienings en geloof, beoordeel.¹³⁰

Die verweer van selfbehoud is egter deur die Regskommissie gekritiseer.¹³¹ Eerstens het die Regskommissie die verweer gekritiseer aangesien dit slegs op 'n sekere geslag fokus.¹³² Volgens die Regskommissie is die trefwydte van die verweer ook te wyd, aangesien dit beskikbaar is in gevalle van rasse, seksuele en/of fisiese mishandeling of intimidasie.¹³³ Die Regskommissie se laaste kritiekpunt was dat die mishandeling waaraan die vrou onderwerp word nie aan 'n objektiewe maatstaf hoef te voldoen alvorens die verweer tot haar beskikking sal wees nie.¹³⁴ Die effek van laasgenoemde is dat 'n mishandelde vrou haar op selfbehoud kan beroep sodra sy subjektief glo dat die doodmaak van haar mishandelaar noodsaaklik is vir haar selfbehoud.¹³⁵

125 NZLC *Preliminary Paper 41* par 70; NZLC *Report 73* 27.

126 NZLC *Preliminary Paper 41* par 70; NZLC *Report 73* 27.

127 NZLC *Preliminary Paper 41* par 70.

128 NZLC *Preliminary Paper 41* par 70.

129 *Ibid* par 71. Gedurende hierdie objektiewe beoordeling sal daar pertinent gevra word of die mishandelde vrou in 'n verhouding betrokke was met haar mishandelaar. Daar sal ook gevra word of hy haar aan mishandeling en intimidasie blootgestel het.

130 NZLC *Preliminary Paper 41* par 71.

131 *Ibid* par 72.

132 *Ibid* par 72.

133 *Ibid* par 72.

134 *Ibid* par 72.

135 *Ibid* par 72. Die Regskommissie het ook daarop gewys dat die begrip "selfbehoud" nie

In die lig van hierdie kritiekpunte word die moontlikheid van 'n verweer van selfbehoud ook nie vir die Suid-Afrikaanse strafreg aanbeveel nie. Die feit dat die verweer beskikbaar is op grond van 'n mishandelde vrou se subjektiewe geloof hou die risiko in dat 'n Suid-Afrikaanse mishandelde vrou wat haar mishandelaar doodmaak omdat sy bloot nie meer kans sien om met hom saam te leef nie, die verweer kan misbruik ten einde strafregtelike aanspreeklikheid vry te spring. In Suid-Afrika kan die grondwetlikheid van 'n verweer wat slegs vir een geslag voorsiening maak ook in die lig van die gelykeheidsklausule, soos vervat in die *Grondwet van die Republiek van Suid-Afrika* 1996 (hierna Grondwet) bevraagteken word.¹³⁶

Die tweede verweer waarna die Regskommissie verwys het is 'n volkome verweer wat noodweer uitbrei en sodoende 'n totaal nuwe definisie aan noodweer verleen.¹³⁷ In terme van hierdie uitgebreide verweer van noodweer kan 'n mishandelde vrou teen haar mishandelaar optree indien sy reageer op 'n geskiedenis van persoonlike geweld wat teenoor haar gerig is.¹³⁸ Sy kan ook in noodweer teen haar mishandelaar optree indien sy daarvan oortuig is dat haar optrede, naamlik die doodmaak van haar mishandelaar, noodsaaklik is om haarself teen die persoonlike geweld te beskerm.¹³⁹

Volgens die Regskommissie is daar verskeie gronde wat die skep van 'n nuwe definisie vir noodweer regverdig.¹⁴⁰ Eerstens is die gevaar wat deur herhaaldelike geweld geskep word, heeltemal verskillend van die gevaar wat deur 'n enkele, reeds begonne of onmiddellik dreigende aanval geskep word.¹⁴¹ Tweedens is 'n geskiedenis van persoonlike geweld aanduidend van toekoms-

omskryf word nie.

136 Sien a 9 Grondwet in verband met die gelykeheidsklausule.

137 NZLC Report 73 27. Sien ook NZLC Preliminary Paper 41 par 74 en 76.

138 Dit blyk uit NZLC Preliminary Paper 41 par 74 en NZLC Report 73 28. Hierdie verweer maak voorsiening vir beide manlike en vroulike slagoffers van gesinsgeweld. Die verweer geld ook waar 'n mishandelde vrou optree ter beskerming van 'n derde.

139 Dit blyk uit NZLC Preliminary Paper 41 par 74 en NZLC Report 73 28.

140 NZLC Preliminary Paper 41 par 76.

141 Ibid.

tige geweld.¹⁴² Die Regskommissie het ook aangetoon dat 'n dreigement wat aan die slagoffer gerig word en die proporsionaliteit van haar reaksie op daardie dreigement, nie uitsluitlik teen die onmiddellike dreigement beoordeel kan word nie.¹⁴³ Verder is daarop gewys dat by 'n reeds begonne of onmiddellik dreigende aanval, realistiese en redelike alternatiewe tot die gebruik van die geweld nie noodwendig realisties en redelik sal wees in situasies waar herhaaldelike mishandeling betrokke is nie.¹⁴⁴

Die Regskommissie was egter van mening dat die noodsaaklikheid vir die gebruik van geweld nie uitsluitlik op 'n mishandelde vrou se sienings beoordeel moet word nie.¹⁴⁵ Volgens die Regskommissie kan dit onaanvaarbaar wees om haar optrede heeltemal te verskoon in gevalle waar haar reaksie objektief onredelik is, selfs al het sy geglo dat haar optrede noodsaaklik was.¹⁴⁶

Die derde verweer waarna die Regskommissie verwys, is die volkome verweer van tiranniemoord ('tyrannicide') en is gebaseer op objektiewe kriteria.¹⁴⁷ Hierdie verweer is spesifiek gerig op mishandelde vroue wat poog om hulself van hulle mishandelaars te bevry.¹⁴⁸ Die sentrale idee agter hierdie verweer is dat waar een persoon omstandighede van private tirannie geskep het, dit moreel regverdigbaar sal wees vir die slagoffer van die private tirannie om die tiran dood te maak indien daar vir haar geen ander redelike manier is om vanaf die tiran te vlug nie.¹⁴⁹

'n Mishandelde vrou moet aan twee vereistes voldoen alvorens sy haar op tiranniemoord kan beroep. Eerstens moet omstandighede van private tirannie bewys word.¹⁵⁰ Private tirannie is die geval waar een persoon, die tiran, beheer

142 *Ibid.*

143 *Ibid.*

144 *Ibid.*

145 NZLC *Preliminary Paper 41* par 76.

146 *Ibid.*

147 Sien Cohen 1996 *U Pitt LR* 758, 763 en NZLC *Preliminary Paper 41* par 77.

148 Dit blyk uit NZLC *Preliminary Paper 41* par 77 en NZLC *Report 73* 28. Hierdie verweer is nie bedoel om alle mishandelde beskuldigdes in te sluit nie.

149 Cohen (n 147) 758, 795. Sien ook NZLC *Preliminary Paper 41* par 79.

150 Cohen (n 147) 802; NZLC *Preliminary Paper 41* par 78.

oor die slagoffer uitoefen.¹⁵¹ Die tiran sal deur sosiale isolasie, geweld en dreigemente van geweld beheer oor die slagoffer behou.¹⁵² Deur gebruikmaking van hierdie middele voorkom die tiran dat die slagoffer haarself van sy beheer bevry.¹⁵³ Die tweede vereiste waaraan voldoen moet word is dat die doodmaak van die tiran vir die slagoffer redelik noodsaaklik moet wees ten einde van die tiran te ontkom.¹⁵⁴ By hierdie vereiste word die tradisionele standarde van redelikheid en noodsaaklikheid ten opsigte van die slagoffer se optrede gebruik.¹⁵⁵ Die volgende moet in ag geneem word wanneer redelikheid oorweeg moet word:

... the risks to the subject of choosing an alternative to killing the tyrant, and the availability and efficacy of the community's own efforts to end such tyrannies ...¹⁵⁶

Die verweer van tiranniemoord hou verskeie voordele in. Die verweer spreek die gewelddadige beheer wat 'n mishandelaar oor die mishandelde vrou het, aan.¹⁵⁷ Die gevaar verbonde aan 'n mishandelde vrou se pogings om vanaf haar mishandelaar se beheer te ontsnap, word ook deur die verweer van tiranniemoord aangespreek.¹⁵⁸ Die grootste nadeel verbonde aan tiranniemoord is dat die verweer nie met akkuraatheid bepaal watter vlak van tirannie en gevaar vereis word om die doodmaak van die tiran te regverdig nie.¹⁵⁹

Die verweer van tiranniemoord kan aan verskeie punte van kritiek onderwerp word. In die eerste plek hou die skep van enige nuwe verweer onsekere en onbedoelde nagevolge vir die strafreg in Nieu-Seeland in.¹⁶⁰ Daarom is dit beter om bestaande verwere uit te brei as om nuwes te skep.¹⁶¹ Die volgende

151 Cohen (n 147) 794; NZLC *Preliminary Paper 41* par 78; NZLC *Report 73* 28.

152 Cohen (n 147) 794; NZLC *Preliminary Paper 41* par 78. Die geweld en dreigemente van geweld hoef nie net teenoor die slagoffer gerig te wees nie. Dit kan ook teenoor persone, wat na aan die slagoffer is, gerig wees.

153 NZLC *Preliminary Paper 41* par 78; NZLC *Report 73* 28.

154 Cohen (n 147) 802; NZLC *Preliminary Paper 41* par 78; NZLC *Report 73* 28.

155 Cohen (n 147) 802; NZLC *Preliminary Paper 41* par 78.

156 NZLC *Preliminary Paper 41* par 79. Sien ook Cohen (n 147) 802.

157 NZLC *Preliminary Paper 41* par 80.

158 *Ibid.*

159 *Ibid.*

160 NZLC *Report 73* 29.

161 *Ibid.*

punt van kritiek is dat die skep van 'n afsonderlike verweer vir mishandelde vroue die indruk sal skep dat mishandelde vroue spesiale behandeling geniet.¹⁶² Die laaste kritiekpunt is dat dit moeilik sal wees om 'n voldoende verweer vir mishandelde vroue te omskryf.¹⁶³

In die lig van die verskeie kritiekpunte het die Regskommissie teen die skep van 'n afsonderlike gedeeltelike verweer vir moorddadige mishandelde vroue besluit.¹⁶⁴ Die Regskommissie was van oordeel dat 'n diskresie ten opsigte van vonnisoplegging meer verkieslik sal wees.¹⁶⁵ Die Regskommissie het ook besluit teen die skep van 'n volkome verweer vir moorddadige mishandelde vroue.¹⁶⁶ In hierdie verband is die Regskommissie van mening dat dit beter sal wees om die algemene vereiste van redelikheid by noodweer op so 'n wyse te interpreteer dat dit die gebruik van geweld wat noodsaaklik is om lyf en lede te beskerm en wat gerig is teen 'n aanval wat nie onmiddellik dreigend is nie, te inkorporeer.¹⁶⁷

5.4 Afsonderlike verweer in Suid-Afrika

In Suid-Afrika het die moontlikheid van 'n afsonderlike verweer vir moorddadige mishandelde vroue vir die eerste keer in *S v Engelbrecht*¹⁶⁸ ter sprake gekom. In hierdie saak is die hof versoek om weg te beweeg van 'n individuele regverdigingsgrond, soos noodweer, na 'n algemene verweer van redelikheid. Só 'n ontwikkeling van die reg sal inhou dat 'n hof wyer kyk as net na die streng vereistes van die uitgekristalliseerde regverdigingsgronde om 'n meer algemene verweer van redelikheid toe te pas.¹⁶⁹

By die toepassing van 'n algemene redelikeidsverweer kan die *Grondwet* effektief aangewend word by die bepaling van die gemeenskapsopvatting.¹⁷⁰ 'n

¹⁶² *Ibid.*

¹⁶³ *Ibid.*

¹⁶⁴ NZLC Report 73 30; Roth (n 33) 30.

¹⁶⁵ NZLC Report 73 30; Roth (n 33) 30.

¹⁶⁶ NZLC Report 73 30; Roth (n 33) 30; NZLC Report 73 29.

¹⁶⁷ NZLC Report 73 29. Sien ook Roth (n 33) 30.

¹⁶⁸ 2005 (2) SASV 41 (W) 157h.

¹⁶⁹ *S v Engelbrecht* 2005 (2) SASV 41 (W) 157i.

¹⁷⁰ *S v Engelbrecht* 2005 (2) SASV 41 (W) 157i.

Mishandelde vrou se optrede word dus getoets teen objektiewe standarde soos beliggaam in, onder andere, grondwetlike waardes en beginsels.¹⁷¹ Hierdie objektiewe standarde kan haar spesifieke omstandighede tydens die doodmaak van haar mishandelaar insluit.¹⁷² Daar is egter geen kriteria voorgestel vir die vasstelling van redelikheid as 'n algemene verweer nie.¹⁷³ Satchwell R¹⁷⁴ was van mening dat die kriteria en toets vir noodweer die mees geskikte kriteria en toets vir 'n algemene redelikhedsverweer sal wees. Volgens haar is dit moeilik om in te dink hoe die howe 'n algemene redelikhedsverweer sal toepas sonder om dieselfde ondersoek te loods as in die geval van noodweer.¹⁷⁵ Op grond van hierdie redes wys Satchwell R¹⁷⁶ die voorgestelde ontwikkeling van die reg van die hand. Daar kan nie fout gevind word met die redes vir haar besluit nie en haar siening word ondersteun. Volgens Reddi¹⁷⁷ behoort die Suid-Afrikaanse howe eerder voort te gaan om mishandelde vroue wat hulle mishandelaars doodmaak, te behandel ooreenkomstig bestaande, uitgekristalliseerde regverdigingsgronde. Die Regskommissie¹⁷⁸ van Nieu-Seeland se aanbeveling dat daar in mishandelde vroue se strafsake verwys moet word na die dinamika van mishandelende verhoudings en die effek van mishandeling op slagoffers oor die algemeen, word ook ondersteun.

6 Samevatting en gevolgtrekking

In Suid-Afrika kan 'n uitbreiding van die dreigende-vereiste by noodweer, soos in Victoria en Wes-Australië, nie ondersteun word nie. Die Suid-Afrikaanse posisie met betrekking tot die verweer van provokasie blyk voordeliger te wees as die hervorming van die verweer in die Noordelike Gebiede. Omdat

171 *S v Engelbrecht* 2005 (2) SASV 41 (W) 157i.

172 *S v Engelbrecht* 2005 (2) SASV 41 (W) 158a.

173 *S v Engelbrecht* 2005 (2) SASV 41 (W) 158b.

174 *S v Engelbrecht* 2005 (2) SASV 41 (W) 158c.

175 *S v Engelbrecht* 2005 (2) SASV 41 (W) 158b.

176 *S v Engelbrecht* 2005 (2) SASV 41 (W) 158c.

177 Reddi (n 74) 278.

178 Hierdie voorstel is gemaak deur die Regskommissie van Nieu-Seeland. Sien NZLC *Final Report* 73 6.

verminderde toerekeningsvatbaarheid slegs relevant is ten opsigte van vonnisoplegging, kan dit vir die Suid-Afrikaanse strafreg voordelig wees om 'n verweer van verminderde toerekeningsvatbaarheid te skep. Verminderde toerekeningsvatbaarheid sal dan as 'n volkome verweer wat strafregtelike aanspreeklikheid ten volle uitsluit, geld. In hierdie verband kan die hervorming van verminderde toerekeningsvatbaarheid in Engeland en Wallis leiding aan Suid-Afrika bied.

Alhoewel daar goeie argumente bestaan vir die skep van 'n afsonderlike verweer vir mishandelde vroue, word so 'n stap nie vir die Suid-Afrikaanse reg aanbeveel nie. So 'n afsonderlike verweer kan ongewenste en onbeoogde gevolge vir die Suid-Afrikaanse strafreg meebring. Daar is ook 'n risiko dat 'n afsonderlike verweer deur moorddadige mishandelde vroue misbruik kan word in 'n desperate poging om strafregtelike aanspreeklikheid vry te spring. Die omvang van 'n afsonderlike verweer wat uitsluitlik voorsiening maak vir die vroulike slagoffers van gesinsgeweld, sal te eng en gevolglik ook grondwetlik aanvegbaar wees. In die lig hiervan word aanbeveel dat die houe in Suid-Afrika eerder moet voortgaan om moorddadige mishandelde vroue ooreenkomstig bestaande, uitgekristalliseerde regverdigingsgronde te behandel.

Bibliografie

Anon 1990 *Harv LR*

Anonymous "Generalizing Justice" 1990 *Harvard Law Review* 1384-1389

Bonthuys *et al* "Gender"

Bonthuys *et al* "Gender" in Joubert WA en Feris JA (reds) *LAWSA: The Law of South Africa* (Butterworths Durban 2005) 277-386

Burchell *Criminal Law*

Burchell J *Principles of Criminal Law* 3^{de} uitg (Juta Landsdowne 2005)

Cohen 1996 *U Pitt LR*

Cohen JM "Regimes of Private Tyranny: What do they mean to morality and for the Criminal Law?" 1996 *University of Pittsburgh Law Review* 757-808

Easteal "Battered women who kill"

Easteal P "Battered women who kill: A plea of self-defence" in *Woman and the law Proceeding of a conference* 24-26 September 1991 Canberra 37-47

Elliott en Quinn *Criminal Law*

Elliott C en Quinn F *Criminal Law* 5^{de} uitg (Pearson Education London 2004)

Grant 2005 *ASSAL*

Grant J "Criminal Law" 2005 *Annual Survey of South African Law* 654-671

Humphreys *et al* *Law Com No 304*

Humphreys S *et al* "Murder, Manslaughter and Infanticide" *Law Com No 304* (2006)

LRCWA *Final Report*

Law Reform Commission of Western Australia "Review of the law of homicide" *Final Report* (2007)

Matthee *Mishandelde vrou-sindroom*

Matthee JL *Mishandelde vrou-sindroom en strafregtelike aanspreeklikheid*
(LLM-verhandeling NWU 2008)

MJ *Consultation Paper CP19/08*

Ministry of Justice "Murder, Manslaughter and Infanticide: Proposals for
reform of the law" *Consultation Paper CP19/08* (2008)

Mouzos en Rushforth 2003 *TICCCJ*

Mouzos J en Rushforth C "Family Homicide in Australia" 2003 *Trends and
Issues in Crime and Criminal Justice* 1-6

Nicholson 2004 *De Rebus*

Nicholson C "When Wives Kill Their Husbands" 2004 *De Rebus* 27-30

NZLC *Preliminary Paper 41*

New Zealand Law Commission "Battered Defendants Victims of Domestic
Violence Who Offend - A Discussion Paper" *Preliminary Paper 41* (August
2000)

NZLC *Report 73*

New Zealand Law Commission "Some Criminal Defences with Particular
Reference to Battered Defendants" *Report 73* (2001)

O'Donovan 1991 *JLS*

O'Donovan K "Defences for Battered Women Who Kill" 1991 *Journal of
Law and Society* 219-240

Pieterse-Spies 2006 *THRHR*

Pieterse-Spies A "A South African Perspective on Battered Women Who
Kill Their Abusive Partners" 2006 *Tydskrif vir Hedendaagse Romeins-
Hollandse Reg* 309-318

Quick en Wells 2006 *CLR*

Quick O en Wells C "Getting Tough With Defences" 2006 *Criminal Law Review* 514-524

Reddi 2005 *SACJ*

Reddi M "Battered woman syndrome: Some reflections on the utility of this 'syndrome' to South African women who kill their abusers" 2005 *South African Journal of Criminal Justice* 259-278

Robinson, Human en Boshoff *Familiereg*

Robinson JA, Human S en Boshoff A *Inleiding tot die Suid-Afrikaanse Familiereg* 2^{de} uitg (Printing Things Potchefstroom 2005)

Roth *Briefing Paper No 3/07*

Roth L "Provocation and Self-defence in Intimate Partner and Homophobic Homicides" *Briefing Paper No 3/07* (2007)

Schuller en Vidmar 1992 *LHB*

Schuller RA en Vidmar N "Battered Woman Syndrome Evidence in the Courtroom: A Review of the Literature" 1992 *Law and Human Behavior* 273-291

Shaffer 1997 *U Tor LJ*

Shaffer M "The Battered Woman Syndrome Revisited: Some Complicating Thoughts Five Years after *R. v. Lavallee*" 1997 *University of Toronto Law Journal* 1-33

Snyman *Strafreg*

Snyman CR *Strafreg* 5^{de} uitg (Butterworths Durban 2006)

Van der Merwe *Verminderde Strafbaarheid*

Van der Merwe DP *Die Leerstuk van Verminderde Strafbaarheid* (LLD-proefskrif Unisa 1980)

VLRC Final Report

Victoria Law Reform Commission "Defences to Homicide" *Final Report*
(2004)

VLRC Options Paper

Victorian Law Reform Commission "Defences to Homicide" *Options Paper*
(2003)

Walker Terrifying Love

Walker LE *Terrifying Love: Why Battered Women Kill and How Society Responds* (Harper & Row New York 1989)

Walker The Battered Woman

Walker LE *The Battered Woman* (Harper & Row New York 1979)

Willoughby 1989 U Kan L Rev

Willoughby MJ "Rendering Each Woman Her Due: Can a Battered Woman Claim Self-Defence When She Kills Her Sleeping Batterer" 1989 *University of Kansas Law Review* 169-184

Register van wetgewing en beleidsdokumente

Coroners and Justice Bill

Crimes Act 1958

Criminal Code Act Compilation Act 1913

Criminal Reform Amendment Act (No 2) 2006 (Wet 34 van 2006)

Grondwet van die Republiek van Suid-Afrika 1996

Homicide Act 1957

Strafproseswet 51 van 1977

Vierde Algemene Regswysigingswet 132 van 1993

Wet op Voorkoming van Gesinsgeweld Wet 133 van 1993

Register van hofsake

Director of Public Prosecutions: Transvaal v Venter 430/2007 2008 ZASCA 76

Pearl Assurance Co Appellant v Union Government Respondent 1934 AD 560
243/360

R v Lavallee 1990 1 SCR 852 (SCC) (Kanada)

S v Baloyi 2000 (2) SA 425 (KH)

S v Eadie 2001 (1) SASV 172 (K)

S v Eadie 2002 (3) SA 719 (HHA)

S v Els 1993 (1) SASV 723 (O)

S v Engelbrecht 2005 (2) SASV 41 (W)

S v Ferreira 2004 (2) SASV 454 (HHA)

S v Henry 1999 (2) SASV 13 (HHA)

S v Kok 2001 (2) SASV 106 (HHA)

S v Laubscher 1988 (1) SA 163 (A)

S v Potgieter 1994 (1) SASV 61 (A)

S v Shapiro 1994 (1) SASV 112 (A)

Register van internetbronne

Bills 2008-2009 www.justice.gov.uk/

Bills 2008-2009 *Coroners and Justice* www.justice.gov.uk/bills/2008-09/coronersandjustice.html [datum van gebruik 7 Desember 2009]

Craven 2003 www.austdvclearinghouse.unsw.edu.au/

Craven Z 2003 *Battered woman syndrome*

www.austdvclearinghouse.unsw.edu.au/PDF%20files/battered%20_woman_syndrome.pdf [datum van gebruik 2 Maart 2008]

Lewis 2005 www.womenshistory.about.com/

Lewis JJ 2005 *Rule of Thumb: Not Really*

www.womenshistory.about.com/od/mythsofwomenshistory/a/rule_of_thumb.htm [datum van gebruik 28 Oktober 2008]

Sommers 1994 www.canlaw.com/rights/thumbrul.htm

Sommers CH 1994 *Debunking yet another feminist myth*

www.canlaw.com/rights/thumbrul.htm [datum van gebruik 28 Oktober 2008]

Vetten 2000 www.csvr.org.za/

Vetten L 2000 *Ultimately, society must protect women*

[www.csvr.org.za/index.php?option=com_content&](http://www.csvr.org.za/index.php?option=com_content&task=view&id=102&Itemid=29)

[task=view&id=102&Itemid=29](http://www.csvr.org.za/index.php?option=com_content&task=view&id=102&Itemid=29) [datum van gebruik 1 Oktober 2008]

Vetten 2005 www.csvr.org.za/

Vetten L 2005 *Staying in an abusive relationship is not a crime*

[www.csvr.org.za/index.php?option=com_content&task=view&id=90&Itemid=](http://www.csvr.org.za/index.php?option=com_content&task=view&id=90&Itemid=29)

[29](http://www.csvr.org.za/index.php?option=com_content&task=view&id=90&Itemid=29) [datum van gebruik 1 Oktober 2008]

Lys van afkortings

a	artikel(s)
LRCWA	Law Reform Commission of Western Australia
MJ	Ministry of Justice
NZLC	New Zealand Law Commission
par	paragraaf/paragrafe
VLRC	Victorian Law Reform Commission